

AUTORSKE NOVINE

oktobar/listopad 2017.

SADRŽAJ:

- **AMUS organizovao okrugli sto za autore**
- **Predstavnici SOKOJ-a boravili u radnoj posjeti AMUS-u**
- **Uposlenici AMUS-a uspješno okončali edukaciju u Švicarskoj**
- **Uposlenici Stručne službe AMUS-a u radnoj posjeti kolegama iz HDS ZAMP-a**
- **Objavljen Konkurs za dodjelu sredstava iz Fonda za kulturne i socijalne namjene**
- **Informacija članstvu AMUS-a o rezultatima analize mogućnosti povrata zgrade Udruženja kompozitora BiH**

AMUS organizovao okrugli sto za autore

U organizaciji AMUS-a 28.07.2017. je u Hotelu Kristal na Ilidži održan okrugli sto pod nazivom „AMUS + CISAC = Nove mogućnosti za autore“. Ovaj okrugli sto bio je jedan od programskih sadržaja tradicionalnog festivala narodne muzike „Ilidža 2017“, koji se održavao od 26. do 29. jula ove godine.

Okrugli sto u organizaciji AMUS-a bio je posvećen nedavnom prijemu AMUS-a u redovno članstvo Svjetske konfederacije autorskih društava (CISAC). Činjenica da je AMUS postao punopravan član ove svjetske porodice autora od velikog je značaja za domaće autore te za cjelokupno domaće muzičko stvaralaštvo. O prednostima koje ovakav status AMUS-a na globalnoj sceni



donosi članovima AMUS-a govorili su Amir Šehić, član Upravnog odbora AMUS-a i Haris Hasić, magistar i stručnjak iz oblasti autorskog prava. Oni su istakli kako redovno članstvo u CISAC-u pred AMUS stavlja nove izazove, ali daje i nove mogućnosti kako za AMUS u cjelini, tako i svakog njegovog člana.



Okruglom stolu prisustvovao je velik broj članova AMUS-a, koji su aktivno učestvovali u radu okruglog stola.

Predstavnici SOKOJ-a boravili u radnoj posjeti AMUS-u

U okviru radne posjete AMUS-u Organizacije muzičkih autora Srbije „SOKOJ“ 03.10.2017. održan je sastanak sa predstavnicima ove organizacije..

Sastanku su u ime SOKOJ-a prisustvovali, Radoljub Stojanović član Upravnog odbora i Srećko Barbarić šef Službe za dokumentaciju i raspodjelu. U ime AMUS-a sastanku su prisustvovali, Nedim Babović potpredsjednik Upravnog obora, Nedžad Imamović član Upravnog odbora, Samir Mujagić

sekretar AMUS-a, mr. Lejla Trnčić generalna direktorica Stručne službe, kao i Nardin Mašić šef odjela za pravne poslove i Sabina Hajrudinović šef



odjela za distribuciju.

Teme sastanka bile su vezane za podizdavače na teritoriji BiH, naplatu autorskih naknada od YouTube-a i situacije sa elektronskim medijima.

Dogovoreni su konkretni koraci koji će doprinijeti kvalitetnijoj saradnji između dvije kolektivne organizacije u interesu svih autora i nosilaca autorskih prava.

Uposlenici AMUS-a uspješno okončali edukaciju u Švicarskoj

U periodu od 01. – 03.10.2017. dio uposlenika Stručne službe AMUS-a iz Odjela za distribuciju boravio je u Švicarskoj na edukaciji koju je organizovala kolektivna organizacija iz te zemlje (SUISA). Edukacija se odnosi na online unos autora u IPI sistem (informacioni sistem svih autora) koji koristi više od 230 asocijacija. Po okončanju kursa uposlenici su dobili certifikate koji potvrđuju uspješan završetak njihove edukacije i mogućnost da samostalno unose naše autore u navedeni sistem.



Uposlenici AMUS-a boravili u radnoj posjeti kolegama iz HDS ZAMP-a

Uposlenici Odjela za pravne poslove i Odjela za javno saopštavanje boravili su u Zagrebu, u radnoj posjeti kolegama iz HDS ZAMP-a.

Ispred Stručne službe AMUS-a sastanku su prisustvovali Nardin Mašić, šef odjela za pravne poslove, Sejad Sabljica, šef odjela za javno saopštavanje, Aldin Kurtović, stručni saradnik za pravne poslove, kao i Ammar Švraka i Ensar Kozlić stručni saradnici odjela za javno saopštavanje.

Sastanku su u ime HDS ZAMP-a prisustvovali: Romana Večerić voditeljica sektora javnog priopćavanja, Goran Švogor voditelj odjela administracije kao i Milena Čaćić, voditeljica općih poslova.

Tokom sastanka razmijenjena su iskustva po pitanju izdavanja dozvola korisnicima, naplate dugovanja, podizanja tužbi protiv neodgovornih korisnika, kao i saradnje sa institucijama nadležnih za provođenje zakona.

Sastanak je bio veoma uspješan jer su obje strane bliže upoznate sa načinom rada i rješavanja situacija koje su bile predmetom sastanka.



Glas autora!



Objavljen Konkurs za dodjelu sredstava iz Fonda za kulturne i socijalne namjene

Upravni odbor AMUS-a raspisao je Konkurs za dodjelu sredstava za kulturne namjene, u skladu sa Pravilnikom o fondu za kulturne i socijalne namjene, u ukupnom iznosu do 60.000 KM.

Oblasti i kriteriji koji su obuhvaćeni konkursom :

- Muzičko stvaralaštvo (stimulacija domaćeg muzičkog stvaralaštva);
- Muzičke manifestacije (organizovanje festivala, tribina posvećenih novim djelima i naučnih skupova čija je tematika od značaja za domaće muzičko savremeno i tradicionalno stvaralaštvo);
- Muzičko izdavačko stvaralaštvo (izdavanje nosača zvuka od značaja za domaće muzičko stvaralaštvo, objavljivanje partitura od značaja za muzičku kulturu, objavljivanje analitičkih studija i stručnih muzikoloških publikacija koje su od značaja za domaće muzičko stvaralaštvo).

Pravo da konkurišu za sredstva iz Fonda imaju sva pravna i fizička lica sa teritorije Bosne i Hercegovine koja ispunjavaju uslove konkursa (u daljem tekstu: Aplikanti).

Aplikant koji namjerava koristiti sredstva iz Fonda dužan je Upravnom odboru uputiti prijavu za dodjelu sredstava iz Fonda (U daljem tekstu: Prijava).

Prijava mora sadržavati:

- a) kratak opis programa/projekta iz kojeg mora biti vidljivo da se ostvaruje svrha iz Člana 2. Pravilnika o fondu za kulturne i socijalne namjene;
- b) podatak ili potvrdu iz koje je vidljivo da li je program/projekt sufinansiran i iz nekog drugog izvora (npr. fonda, donacija ili na temelju nekog drugog konkursa);
- c) izjavu aplikanta kojom se isti se obavezuje da će program/projekat realizovati u određenom roku;
- d) saglasnost autora/nosilaca autorskog prava za realizaciju muzičkih djela koja su sadržana u programu/projektu a organizatori festivala je mogu naknadno dostaviti, do potpisivanja ugovora sa AMUS-om;
- e) izjavu aplikanta kojom se isti se obavezuje da će u svim promotivnim nastupima u javnosti AMUS biti pomenuto verbalno, na štampanom, promotivnom i svakom drugom materijalu kao i da će logo AMUS-a biti zastupljen na cjelokupnom promotivnom materijalu koji prati realizaciju programa/projekta.

Prednost pri odlučivanju imat će projekti koji stimulišu stvaranje novih autorskih djela, kao i aplikanti koji nemaju izdavačke i profesionalne ugovore i/ili nisu budžetski korisnici.

Prijava se podnosi AMUS-u, na obrascu koji je u prilogu ovog Konkursa na web stranici www.amus.ba, lično ili putem pošte na jednu od sljedećih adresa AMUS-a:

Trg solidarnosti 2a
71000 Sarajevo, ili

Veselina Masleše 1
78 000 Banja Luka, ili

Kneza Branimira 6
88 000 Mostar

sa naznakom Prijava na konkurs.

Nepotpune i neblagovremene prijave se neće razmatrati.

Konkurs je otvoren do 31.10.2017. godine.

Informacija članstvu AMUS-a o rezultatima analize mogućnosti povrata zgrade Udruženja kompozitora BiH

Nakon što je Skupština AMUS-a na sjednici 5.4.2017. godine informisana o potencijalnoj mogućnosti povrata zgrade koja je bila dodijeljena na trajno korištenje Udruženju kompozitora Bosne i Hercegovine (1. i 2. sprat zgrade u ulici Radićeva 15, u kojoj je danas smješten Hotel Cosmopolit), nastavljeno je sa aktivnostima kojima bi se u konačnici mogao realizovati navedeni povrat.



Pribavljanjem relevantne dokumentacije ustanovljeno je sljedeće: Rješenjem Općine Centar Sarajevo iz aprila 1965. godine uknjiženo je pravo trajnog korištenja u korist Udruženja kompozitora BiH. Rješenjem Općine Centar Sarajevo od 1.12.1997. godine poništeno je pravosnažno prethodno navedeno Rješenje, a Općina Centar Sarajevo uknjižena kao nosilac prava raspolaganja dijelom 1/1.

Za potrebe eventualnog dokazivanja pravnog sljedništva AMUS-a nad Udruženjem kompozitora BiH, Stručna služba je pribavila spis kod Ministarstva pravde BiH i nije pronašla nijedan dokument kojim se potvrđuje ili dokazuje pravno sljedništvo AMUS-a nad Udruženjem kompozitora BiH.

Stav advokata čija su uža specijalnost imovinsko-pravni odnosi je da, imajući u vidu sve navedeno, ne postoji mogućnost za povrat zgrade, čime su iscrpljene sve mogućnosti potraživanja u povrat predmetne zgrade, bilo na korištenje, bilo u vlasništvo, bilo da opština AMUS-u dodijeli novi prostor.

Temeljem iznad navedenog, organi upravljanja će ponovo pokrenuti aktivnosti na objavljivanju konkursa za dostavljanje ponuda za kupovinu poslovnog prostora za potrebe AMUS-a.